

La regenza na vul nagina ulteriura reducziun da l'armada en il Grischun

■ (cc) La regenza grischuna prenda posiziun davart la fatschenta federala per midar la basa giuridica da sviluppar vinavant l'armada. La regenza beneventa il project federal da sviluppar vinavant l'armada, da priorisar sias incumbensas tenor las resursas che la stattan a disposiziun e d'adaptar correspondentamain la basa legala. L'armada sa e duai distgargiar las autoritads civilas cun ina vasta paletta d'acziuns da sustegn per dumagnar catastrofas e situaziuns d'urgenza, per ademplir autras incumbensas d'impurtanza naziunala sco er per sa defender cunter privels gravants da la segirezza interna.

Als ultims 20 onns èn vegnidas reducidas en il chantun Grischun var 140 plazzas en il sector da l'armada. Ultra da quai è il chantun Grischun stà pertutgà surproporzionalmain da las mesiras da reducziun dal concept da staziunament 2005. Perquai spetga la regenza da la confederaziun ch'i na vegnian reducidas

pli naginas ulteriuras plazzas da lavur, plazzas d'armas, infrastruttura e commandos en il chantun Grischun. Er da l'annullaziun da la brigada d'infanteria da muntogna 12 cun il commando respectiv staziunà en la caserna a Cuira duai vegnir desistì. Cas cuntrari van a perder ulteriuras plazzas da lavur en la regiun da Cuira e pia er la buna veglia envers l'armada.

Il resultat da la votaziun davart l'iniziativa federala dal pievel «Gea a l'aboliziun dal servetsch militar obligatoric» dals 22 da settember 2013 dal chantun Grischun – 77,1 pertschient cunter l'iniziativa – mussa ch'il chantun Grischun sustegna l'armada. Da questa tenuta positiva stoi vegnir tegnì quint tar la realisaziun dal concept da staziunament per sviluppar vinavant l'armada, renunziand a la reducziun da plazzas da lavur, da plazzas d'armas, d'infrastructura e da commandos.